



1758, 3 250

FACVLTATIS IVRIDICAE
EX-DECANVS
CONRADVS WILHELMVS
STRECKER

ICTVS,

EMINENTISSIMI AC CÉLSSIMI PRINCIPIS ELECTORIS MOGVN-
TINI CONSILIARIVS REGIMINIS, MEMORATAE FACVLTATIS AS-
SESSOR SENIOR, IVRIS FEVDALIS PROFESSOR PVBL. ORDI-
NARIVS, NEC NON CIVITATIS ERFORDIENSIS SYN-
DICVS ET CONSVL PRIMARIVS

LECTORI BENEVOLO

S. P. D.

ERFORDIAE,
Litteris HERINGIANIS, ACAD. TYPOGR.

Quae in antiquis Romanorum Legibus de hereditatis acquisitione & transmissione disposita fuerunt, iure nouo in multis immutata, correctaque esse, cum ex alijs Impp. Constitutionibus, tum maxime ex *l. 18. C. de iure deliber.* perspicue apparet. Continet illa lex, quae secundum IASONEM adeo singularis est, vt nullam in iure concordantem habeat, referente BERGERO in *Diff. de transmiss. heredit.* §. 30. quatuor potissimum capita, quibus iuri Veteri derogatum est. Primum enim pater hereditatem infanti delatam pro eo olim adire non poterat, cum hereditatis aditio actus esset legitimus, *l. 77. D. de regul. iur.* & ideo ab ipso herede, non ab alio expediri deberet. IOSEPH. AVERAN. *Interpretat. Iur. L. 1. c. 12. n. 5. sqq.* vnde consequebatur, patrem non nisi mediante bonorum possessione, quam infanti filio petere licebat, *l. 7. §. 1. D. de bonor. possess. l. 1. D. de bonor. possess. furioso infanti compet.* emolumentum successionis infanti, & per hunc fibi potuisse acquirere *l. 3. C. qui admitti ad bonor. possess.* Verum Impp. THEODOSIVS II. & VALENTINIANVS III. in allegata *l. 18. pr. n. 13.* patri permiserunt, vt hereditatem infanti vel testamento relictam, vel ab intestato delatam, eius nomine aut adire, aut bonorum possessionem agnoscere queat. Neque vero, vt pater voluntatem adeundi expresse declaret, necesse est, sed si is bona e. g. materna filio infanti delata vltra annum retinuerit, hereditatem nomine infantis adiuisse praesumitur, obseruante BRVNNE-MANN. in *d. l. 18. n. 13.* Deinde quamuis iure veteri hereditas infanti delata, ea nec adita, nec bonorum possessione petita, post mortem infantis ad patrem haudqua-

quaquam transmitteretur: iidem tamen Imp. in c. l.
18. §. 1. perquam humaniter sanxerunt, vt parens su-
perstes omnia ex quacunque successione ad infantem
demortuum deuoluta iure patrio, quasi iam infanti quae-
sita capere possit, licet eius nomine hereditatem adire,
aut bonorum possessionem agnoscere neglexerit. Quae
transmissionis species admodum singularis est, & a re-
liquis hereditatis transmittendae modis oppido differt,
cum neque iure suitatis, neque ex ratione sangui-
nis, neque ratione iuris deliberandi fiat. Quid autem
laudatos Imperatores ad nouum hocce ius introducen-
dum permouerit, non omnino expeditum est. Alii
quippe ex benigna infantilis aetatis commiseratione
illud factum esse existimant, PEREZ. in C. Tit. de iure de-
liber. n. 25. alii vero patrem propter patriam potestatem
ad eam hereditatem admissum fuisse censent. BRUNNE-
MANN. in c. l. 18. n. 8. At enim vero cum legis nostrae
dispositio magis ad patris, quam infantis fauorem per-
tineat, eique non minus locus sit, etsi quacunque causa
sui iuris infans inueniatur d. l. 18. §. 3. in f. facile est ad
intelligendum, memoratas causas pro veris haberi non
posse. Verosimilius itaque asseritur, Legislatores no-
stros simpliciter ad *ius patrium*, siue ad *qualitatem pater-
nam* respexisse, & in compensationem forte onerum,
quae patri intuitu infantis incumbunt, ita statuisse
conf. HARPPRECHT. de transmiss. heredit. a persona extran.
infanti delatae §. 7. Vol. 1. Disp. 47. Vnde porro collig-
itur, ius hoc singulare intuitu solius patris inuectum
ad matrem infantis & fratres, aliosque cognatos pro-
ferri haud posse, docente HARPPRECHT c. l. §. 19. nisi
forte infans intra annum deliberandi decefferit, tunc
enim

enim hereditas eidem delata non ad solum patrem, sed ad quosuis infantis heredes, velut matrem & fratres iuxta *l. 19. C. de iure deliber.* transmittitur, quemadmodum ipse Imperator IVSTINIANVS in *Nouell. 158. c. 1.* diferte declarat. v. HARPPRECHT. *c. l. §. 13.* Tertium, quod in lege nostra reperitur, singulare est, quod cum iure antiquo tutor infanti quidem bonorum possessionem petere, *l. 2. §. 13. D. ad SCT. Tertull. l. 65. §. 3. D. ad SCT. Trebell.* hereditatem vero pro eo adire non posset. *CVIAC. obseru. L. 1. c. 34.* eidem ad exemplum patris nunc permissum fit, utroque modo infanti hereditatem quaerere, hoc tamen seruato discrimine, vt si tutor ea facere neglexerit, infante in ea aetate defuncto, hereditates ad eum deuolutae & non agnitae, ita intelligantur, quasi ab initio non essent ad eum delatae, & ad illas personas perueniant, quae vocabantur, si minime hereditas infanti fuisset delata. *c. l. 18. §. 2. §. 3.* Ultimo tandem loco notari meretur, quod pupillo, infantia maiori & tutorem non habenti, decreto Praetoris haereditatem adire nouiter concessum fit *c. l. 18. §. 4. in f.* quod antea in bonorum possessione tantummodo receptum erat. *l. 7. C. qui admitti ad bon. possess.* Verum de his & aliis ad illustrationem legis nostrae notatu dignissimae pertinentibus in Lectione, quam vocant, Curforia copiosius disseret

No.

NOBILIS ET CLARISSIMVS
DOMINVS
CHRIST. FRIDER. IMMANVEL
SCHORCH

Iurium Candidatus meritissimus.

Natus est ille in hanc lucem Erfordiae, anno huius saeculi XXXII. parentibus, quos viuos adhuc colere felicitas illi contingit, clarissimis pariter ac honestissimis. Et patre quidem *Viro Magnifico, Praenobilissimo & Consulissimo DN. HIERON. FRIDER. SCHORCH, ICTO Celeberrimo, Electoral. Regim. Consiliario, Facultatis Iurid. Adessore & Professore Pandect. Publ. Ordin. Ciuitatis Consule Seniore, & Academ. Elect. Mogunt. Scientiarum Vtil. Directore*; Matre vero ELISABETHA DOROTHEA REBECCA, nata UTHIN, Matrona singulari modestia, omnibusque sexus sequioris virtutibus perquam conspicua. Horum venerandissimorum parentum in educando insignem ab incunabulis expertus est curam & sollicitudinem. Illi enim non domi solum praeceptis animum informarunt, sed curarunt etiam, vt in publicis Scholis religionis Christianae principiis, & bonis litteris imbueretur. Frequentare itaque primum coepit *Scholam Mercatorum*, quam tum regebat Dn. M. PFAFFIUS, vir in formandis puerorum ingeniis etiamnum post fata clarus, qui eum in omnibus illis studiis, quibus aetas puerilis instrui solet, diligentissime erudiuit. Praeparatus sic, anno aetatis suae decimo tertio in Gymnasium Senatorium, quod hic floreret, translatus fuit, & elegantioribus litteris operam nauauit. Est ibi iterum nactus praeceptores bonos

& doctos, quippe Professorum in memorato Gymnasio munere tum fungebantur, Viri Clarissimi Dnn. TIEMROTH, WEESSENBORN, B. SINHOLD, ADELUNG, BESLER, & BOHN; inprimis vero laudat Celeberrimum quondam Gymnasii Directorem D. HERMANNUM NICOLAUM STIELER, Virum solide doctum, ex cuius egregiis tam publicis quam priuatis Lectionibus multum se profecisse fatetur. Transacto in illo Gymnasio fere quinquennio, ad Academiam patriam accessit, ibique altiora studia capeffere coepit. Cumque Studio iuris se mancipare decreuisset, statim coepit cum Philosophia legitimae scientiae praecepta coniungere. Et Scholas quidem Philosophicas quod adtinet, Cursum, quem vocant, Philosophicum audiuit apud Dn. Profess. M. ADELUNG Logices vero praecepta in specie ipsi explicauit Vir Celeberr. Dn. Prof. BAUMER. In Scholis vero Juridicis, praeter Virum Consultissimum Dn. Adfessorem & Professorem HENNE, cuius praelectiones in *HEINECCH Elementa secundum Ord. Institur.* frequentauit, vñs est vnico fere praeceptore Dn. Patre, qui illum non *Historiam* solum *iuris Ciuilib, Feudalis & Publici* docuit, sed *textum* quoque *Institutionum Iustinian.* explicauit, & praeterea in *Pandeëtis*, in *Jure Feudali*, in *Jure Ecclesiastico*, in *Historia Imperii Rom. Germ.* in *Jure Publico*, & in *Manuductione ad Praxin forensẽ* principia solidae iuris scientiae tradidit. Hisce studiis in Academia patria absolutis, alias etiam Academias inuisendi, patre adprobante, consilium ceperat. Verum periculosus & longinquus morbus vehementer haec consilia turbauit, & illum modo ad mortem appulit. Biennium & plus eo in illo curando absum-

absumtum fuit, per quod tempus studia omnia paene abicere coactus fuit. Sed ex quo, quam Dei singularem fuisse profiteretur gratiam, morbo illo profligato, conualuit, studia adhuc neglecta resumere, & quae dudum animo agitauerat, exequi coepit. Profectus igitur est ad Salanam Academiam, ibique scientiae incrementa ex praelectionibus Virorum Celeberrimorum sibi comparare studuit. In Mathematicis operam dedit Clarissimo Dn. Professore SVCCOVIO, qui *puram & adplicatam Mathesin* eum docuit. In Iuridicis autem & historicis audiuit *Illustr. Dn. BVDER*, Virum Humanissimum, a cuius ore in *Iure Feud. & Iure publ.* pependit; Consultiff. Dn. Professore SCHMIDTIVM, qui *Historiam S. R. Imp.* ei tradidit; & Consultiff. Dn. KOCHIVM, cuius praelectiones in *Ius Criminale* frequentavit. Per omne quoque tempus, quo Jenae fuit, frequens interfuit exercitiis disputatoriis priuatis, quae ibi sub moderamine Consultiffimi Dn. Prof. WVNDERLICHII instituuntur. Exacto ibi anno, cum bellum duraret, & aditum ad alias Academias, quas ipsi praeterea adire animus erat, velut obsideret, domum redire decreuit, vbi redux factus animum adiecit ad summos in Vtroque iure honores adsequendos. Exhibuit propterea, prout moris est, Ordini nostro literas supplices, petiitque ea, qua decet, modestia, vt dies Examini rigoroso non solum destinaretur, sed & textus ex vtroque iure elaborandi communicarentur; laudabilissimo eius desiderio annuere non dubitauimus, & terminum examini praefiximus, in quo textus ipsi communicatos solide adeo ac erudite enodauit, & quaestiones in ipso examine propositas tam prompte, talique ingenii felicitate & facilitate resoluit,

soluit, vt vnanimi consensu Supremis iurium hono-
ribus dignissimus fuerit iudicatus, & ad edenda reliqua
specimina ipsi publica cathedra fuerit aperta, ex qua
proxima die Lunae, quae erit 2. Octobris *L. 18. C. de
iure deliber.* lectionis curforiae loco explanabit, & differ-
tationem inauguralem

DE

FEVDIS CENSVM

sine Praefide habebit. Ad quos actus Solennes Magnificus
Dn. Rector, nec non Domini Proceres ac Ciues acade-
mici perhumaniter inuitantur, rogantur. Publ. sub Sigill.
Facult. Iurid. d. 1. Octobr. MDCCLVIII.




ULB Halle
005 355 710

3







1758,3
36

FACVLTATIS IVRIDICAE
EX-DECANVS
CONRADVS WILHELMVS
STRECKER

ICTVS,

EMINENTISSIMI AC CÉLSSIMI PRINCIPIS ELECTORIS MOGVN-
TINI CONSILIARIVS REGIMINIS, MEMORATAE FACVLTATIS AS-
SESSOR SENIOR, IVRIS FEVDALIS PROFESSOR PVBL. ORDI-
NARIVS, NEC NON CIVITATIS ERFORDIENSIS SYN-
DICVS ET CONSVL PRIMARIVS

LECTORI BENEVOLO

S. P. D.

ERFORDIAE,
Litteris HERINGIANIS, ACAD. TYPOGR.

